



# S E R M O N

## P R E M I E R,

*Sur*

Malach. IV. v. 2.

*A vous qui craignez mon Nom se leuera  
le Soleil de Justice, & santé sera en ses  
aïles.*



IEU a voulu de tout  
temps que ses grands  
bien-faits & ses grandes  
graces fussent receuës  
par son Eglise avec des  
preparations & dispositions conuenables. Et comme ainsi soit qu'il est la  
saincteté mesme, la disposition & pre-  
paration qu'il a tousiours requise a  
esté le repentance & l'amendement  
de vie. C'estoit la preparation que  
Iehan Baptiste requeroit du peuple  
des Iuifs, quand il leur annonçoit la ve-

A

*Matth. 3.* nue du Christ. *Amendez vous*, disoit-il, *car le royaume des Cieux est prochain*: pour cela il administroit le Baptesme de repentance. Et Iesus Christ nostre Seigneur de mesme, pour preparer les Iuifs à la pleine reuelation de son regne, disoit, *amendez vous, & croyez à l'Euangile.*

*Marc 1.*

Or comme ainsi soit, mes freres, que nous celebrons de temps en temps les grandes œuvres & graces de Dieu, asçauoir l'incarnation de son Filz Iesus Christ, sa mort, & sa resurrection: il est conuenable que nous nous disposions & preparions à cette celebration; comme si tout de nouveau ces merueilles advenoyent au milieu de nous: puis que la celebration que nous en faisons est pour nous les mettre deuant les yeux comme presentes: Outre que ces grandes œuvres de Dieu meritent vne gratitude perpetuelle, & nous obligent à disposer continuellement nos cœurs à recevoir le fruit & le bien qui en proüient.

Pour cette cause ayans à celebrer

Ven-

Vendredi prochain, moyennant l'assistance de Dieu, la naissance de nostre Seigneur & Sauveur Iesus Christ, nous auons choisi les paroles du Prophete Malachie, lequel, pour obliger le peuple d'Israël à se preparer à la venue du Christ en s'addonnant à la crainte de Dieu & au renoncement de leurs pechez, promettoit que ce Messie se leueroit comme vn Soleil de justice à ceux qui craignent Dieu; & introduisoit le Seigneur tenant ces paroles: *A vous qui craignez mon nom se leuera le Soleil de iustice, & santé sera en ses aissles.*

La raison pour laquelle le Seigneur parloit de la sorte estoit, qu'alors le Peuple d'Israel estoit plein de prophanes & contempteurs de Dieu, au milieu desquels les fideles & gens de bien souspiroyent; & estans en petit nombre, se fortifioyent les vns les autres en la pieté. Les prophanes d'entre les peuples auoyent dit hautement qu'il ne profitoit de rien de seruir à Dieu, & qu'ils n'auoyent rien gagné de garder ses ordonnances, que les

A 2

mal-viuants estoyent auancés ; & que s'ils auoyent tenté Dieu, ils estoyent deliurés. Sur quoy les gens de bien s'estoyent assemblés & auoyent témoigné leur indignation contre ces paroles , & leur zele pour l'Eternel : là dessus le Prophete dit que l'Eternel a esté ententif (asçauoir au zele de ses seruiteurs) & qu'un liure de memoire a esté escrit deuant l'Eternel pour ceux qui craignent son nom & pensent à luy , & que l'Eternel a dit ,

*Malac. 3.*

*seront miens lors que ie mettray à part mes plus precieux ioyaux , & ie leur pardonneray , comme vn chacun pardonne à son fils qui le sert.* En suite de quoy il dit au

*Malac. 4.*

*regard des meschans , Voici le iour est venu ardent comme vn four , & tous les orgueilleux & tous ceux qui font meschanceté seront esteule , & ce iour là à venir les embrasera , lequel ne leur laissera ni racine ni rameau. Mais (adjouste-il) à vous qui craignez mon nom se leuera le Soleil de justice, & santé sera en ses aïstes.*

. Or est à remarquer que la dernière venue du Christ en laquelle il apparaitra du ciel avec feu pour faire vengeance

geance des meschans, est souvent  
iointe par les Prophetes à la premiere,  
comme si ces deux venues de Christ  
n'estoyent qu'une. C'est pourquoy au  
chapitre precedent le Seigneur ayant  
dit par Malachie, *Voici, ie m'en vay en-  
voyer mon messenger, (asç. Iehan Baptiste)  
& il accoustrera le chemin deuant moy, &  
incontinent le Seigneur que vous cherchez  
entrera en son temple, & le messenger de  
l'alliance lequel vous souhaitez, asçauoir  
le Christ: voici il vient, a dit l'Eternel des  
armees, (il est adjousté au regard du  
dernier iour) & qui pourra porter le iour  
de sa venue? & qui pourra subsister quand  
il apparoiſtra? Car il est comme le feu de ce-  
luy qui raffine & purifie l'argent. OÙ re-  
marquez en passant que lors que Dieu  
menace de son ire les profanes & mes-  
chants, il a soin de consoler ses enfans  
& de les asseurer de sa grace & dile-  
ction, leur faisant entendre que s'il est  
aux vns vn feu deuant, il sera aux  
autres vn Soleil esclairant & portant  
la santé. Ainsi le Prophete Nahum  
representant l'Eternel marchant avec  
tourbillon & tempeste, faisant tarir la*

mer, & dessechant les fleuves, les montagnes tremblantes de par luy & les costaux s'escoulants, la terre montant en feu à cause de sa presence, & les rochers se demolissans deuant luy, *Nab. l.* adjouste là mesme, *l'Eternel est bon, il est une forteresse au temps de destresse, & reconnoit ceux qui se retirent vers luy.*

Or maintenant pour l'exposition des paroles que nous vous auons leuës considerons trois points.

1. Quel est ce Soleil de iustice qui porte la santé en ses aisles.

2. Quel est son leuer.

3. Qui sont ceux à qui il se leuera, asçauoir ceux qui craignent son nom. Vueille le Seigneur esprendre en nos cœurs les rayons de ce diuin Soleil, afin que craignans son sainct nom, il se leue sur nous en toute grace & benediction, & en consolation eternelle.

## I. P O I N C T.

**Q**uant au premier point. C'est, mes Freres, le style des Prophetes de représenter les calamités par des tenebres, & par vn obscurcissement du So-

Soleil & des estoiles, pource que les tenebres attristent, & que l'esprit affligé est comme obscurci d'ennuy. Ainsi Ioel 2. *La iournée de l'Eternel est près, une iournée de tenebres & d'obscurité, une iournée de nuée & de brouillards espais.* Et à l'opposite les Prophetes representent les deliurances & la prosperité par la lumiere, & par vn iour clair: ainsi au liure d'Esther, il est dit apres la mort d'Aman & la ruine des ennemis du peuple de Dieu, qu'il y eut *lumiere aux Iuifs.* Et Psal: 97. *La lumiere s'est leuée des tenebres à ceux qui sont droits.* Esa. 60. Dieu dit à Ierusalem, *leue toi, sois illuminée, car ta lumiere est venue, & la gloire de l'Eternel s'est leuée sur toy. Car voici les tenebres couuriront la terre, & obscurité couurira les peuples; mais l'Eternel se leuera sur toy, & sa gloire apparostrasur toy.* Or comme ainsi soit que de toutes les deliurances que Dieu promettoit à son peuple la redemption que le Messie apporterait deuoit estre la plus illustre & la plus grande, elle est aussi representée par vne lumiere, & le Messie par vn Soleil espendant

ses rayons en ioye & consolation extraordinaire. Ainsi Esa. 9. le Prophe-  
te dit, *Le peuple qui cheminoit en tenebres a veu une grande lumiere, & ceux qui habitoient au pais d'ombre de mort, la lumiere a resplandi sur eux, & adjouste, car l'Enfant nous est né, le Fils nous a esté donné.*

*Nombres*  
24.

∴ L'ancienne prophetie de Balaam auoir desia parlé du Messie comme d'une estoile qui se leueroit à Israel, *Une estoile, dit-il, est procedée de Jacob, & un sceptre s'est esteué d'Israel, & transpercera les cains de Moab, & détruira les enfans de Seth.* Et Zacharie Pere de Iehan Baptiste ayant esgard au Christ duquel son enfant deuoit estre le precurseur. *Tuy*

*Luc 1.*

*petit enfant tu seras appelé le Prophete du Souuerain, car tu iras denant la face du Seigneur pour apprester ses voyes, & pour donner connoissance du salut à son peuple, par la remission de leurs pechés, par les entrailles de la misericorde de Dieu, desquelles nous a visité l'Orient d'enfant, afin qu'il relaise à ceux qui sont assis en tenebres & en ombre de mort, pour adresser nos pieds au chemin de paix.* Et Iesus Christ nostre Seigneur

gneur est appelé *la lumiere du monde*, & a dit que celuy qui le suit *ne cheminera point en tenebres*, ains aura *la lumiere de vie*. Et Apocal. 22. *Je suis la racine & la posterité de David*, *l'estoile resplendissante & matinere*.

Et certes plus les choses de la nature sont belles & excellentes, plus elles ont de l'image de Dieu, & sont propres pour nous représenter ses effets. Or de tous les corps de la nature le Soleil est le plus excellent, & la lumiere est de toutes les choses créées & inanimées la plus belle & la plus vtile. Si vous considerez le Soleil au regard de la pureté admirable de sa lumiere, il est le symbole de la pureté de son Createur, qui est Lumiere, & n'y a en luy tenebres quelconques. Si vous le considerez au regard de sa vertu, par laquelle estant vnique, il est le principe de tous biens en la nature, il est la vraye image de Dieu qui est le principe de tout estre, & le Pere des lumieres, duquel procede toute bonne donation. Si vous considerez l'estendue & la multiplication de ses effets, qu'il il-

lumine l'air, qu'il contribue à la generation des animaux, qu'il fait pousser les plantes & produire les fruicts, & qu'il n'y a rien en l'univers qui euite sa chaleur & sa vertu. C'est l'image de Dieu qui par l'influence de sa vertu donne vniuersellement à toutes les creatures tant au ciel qu'en la terre tout ce qu'elles ont de subsistence & de biens : Ps. 104. *Caches tu ta face? elles defaillent & retournent en leur poudre. Mais si tu renuoyes ton esprit, elles sont creées, & tu renouelles la face de la terre.*

Or cette belle creature, estant l'image de Dieu, l'a deu estre aussi du Christ le Mediateur; pource que ce Christ est l'image de Dieu inuisible, & qu'estant la resplendeur de la gloire du Pere & la marque engrauée de sa personne, par sa generation eternelle, il l'est aussi par l'œuvre de la redemption & par les merueilles de sa grace à nostre salut. Aussi l'Escriture nous represente les effects de sa grace par les comparaisons de la lumiere.

*Ephes. 5. Vous estiez iadis tenebres, mais maintenant vous estes lumiere au Seigneur : cheminez comme*

*comme enfans de lumiere.* Dieu qui a <sup>2. Cor. 4.</sup> commandé que la lumiere resplendist des tenebres à reluy en nos cœurs pour *donner illumination de la connoissance de sa gloire en la face de Iesus Christ* : son esprit est appelé *esprit de sagesse & de re-* <sup>Ephes. 1.</sup> *uelation qui nous donne les yeux de nos entendemens illuminés*, & son royaume *le royaume des sainctes en lumiere.* Et com- <sup>Coloss. 1.</sup> me en la nature il n'y a qu'un Soleil source & principe des biens qui y sont : ainsi en la grace il n'y a que Iesus Christ source & principe de vie & de salut. Il n'y a *salut en aucun autre qu'en lui,* <sup>Act. 4.</sup> *& n'y a aucun autre nom sous le ciel qui soit donné aux hommes par lequel il nous faille estre sauuez.*

Et si le plus illustre des effets du Soleil est d'esclairer l'air & de nous faire voir les objets que la nuit, comme vn voile sombre & espais, nous couuroit ; Ce Soleil nous fait connoistre Dieu selon les merueilles de sa charité, & nous fait descourir en luy les beautés de sa face, dont la contemplation est nostre vie & restauration. Car si la nature nous monstroit Dieu, c'es-

toit comme Createur dont la maiesté estoit si haut esleuée qu'elle nous estoit inaccessible. Et si la loy nous le monstroit, c'estoit avec vne face terrible contre les pecheurs qui ne pouuoit leur donner que frayeurs, à ce que mesmes vn Moysé vinst à dire, *Je suis espouuanté & en tremble tout.* Or cela n'estoit pas nous faire connoistre Dieu, tandis que sa charité & sa misericorde ne nous estoit pas reuelée, veu qu'il est tout charité. C'est donc Iesus Christ seul qui par l'œuvre de la redemption & par les rayons de son Euangile nous le fait voir & connoistre, selon que S.

*Jean 1.* Iehan disoit, *Nul ne vit onc Dieu, le Fils unique qui est au sein du Pere, c'est luy mesme qui l'a reuelé :* Et Iesus Christ, *qui*

*Jean 14.* *m'a veu il a veu mon Pere.* Et comme sans la lumiere on ne sçait où on va, ainsi sans Iesus Christ nous ne faisons que nous esgarer, mais par luy nous sommes conduits à Dieu & adressés à la vraye felicité. Et au lieu que nostre aueuglement naturel nous faisoit chopper, heurter & nous arrester aux objets de ce siecle qui se presentoyent  
deuant

deuant nous , par luy nous receuons l'esprit de sapience pour tirer droit au but de nostre supernelle vocation, ayans la parole de Dieu & les rayons de l'Orient d'enhaut pour lampe de nos pieds & pour lumiere de nos sentiers, pour adresser nos pieds au chemin de paix. Et si le Soleil est la ioye de la nature, ainsi l'est Iesus Christ de son Eglise : dont l'Ange disoit aux bergers, *Ie vous annonce vne grande ioye, c'est qu'au* Luc 1.  
*ionrd'huy vous est né le Sauueur.*

Or nostre Prophete l'appelle *Soleil de iustice*: ce qui sembleroit deuoir donner de l'estonnement, veu que nous attendons de ce Soleil des rayons de grace & de misericorde , & non la iustice contre les pœvres pecheurs. Car comment subsisterons-nous deuant luy, selon qu'il est dit Ps. 130. *Eternel , si tu prens garde aux iniquités , qui est-ce qui subsistera?* Mais il faut sçauoir, mes Freres , ce qu'emporte ordinairement ce mot de justice au langage des Prophetes ; Il signifie grace, benignité, misericorde & beneficence ; auquel sens l'Escriture appelle l'aumosne *justice*,

comme Ps. 112. *Il est pitoyable, misericordieux & iuste : il a espars, il a donné aux pauvres, sa iustice demeure eternellement.* Et Ps. 51. *Dauid demandant à Dieu pardon du meurtre qu'il auoit commis, disoit, ô Dieu deliure moy de tant de sang, & ma langue chantera hautement ta iustice.* Ainsi Ps. 40. il appelle iustice la gratuité par laquelle Dieu l'auoit deliuré, & laquelle il auoit celebrée : *Je n'ay point caché ta iustice au milieu de mon cœur, i'ay déclaré ta fidelité & la deliurance que tu m'as donnée, ie n'ay point caché ta gratuité & ta verité en la grande congregation.* Et au Ps. 143. *Seigneur respon moy selon ta iustice, & n'entre point en iugement avec ton seruiteur, car nul viuant ne sera iustificié en ta presence.* Là où ces paroles [n'entre point en iugement avec ton seruiteur, car nul viuant, &c.] monstrét que la iustice qu'il implore est la misericorde, la grace, & la benignité ; Et en ce sens il est dit en l'Euangile de Ioseph que voyant sa fiancée enceinte, & ne sçachant pas que c'estoit du S. Esprit, il l'a voulu renvoyer, mais en secret pour ne la pas diffamer, pource qu'il estoit iuste, c'est à di-

à dire benin : Et en ce sens S. Iehan dit que si nous confessons nos pechés, Dieu est fidele & iuste pour nous les par-<sup>1. Iean 1.</sup> donner; iuste, c'est à dire benin.

C'est en ce sens, mes Freres, que le Soleil dont parle Malachie en nostre texte est appelé Soleil de *iustice*, c'est à dire de grace, benignité & misericorde. Ce qui est expliqué par Zacharie, quand il dit, selon que vous l'avez ouy ci-dessus, que *l'Orient d'enhaut nous a visités par les entrailles de misericorde*. Or cela s'accorde fort bien avec vne iustice iustificante que vous attendez de ce Soleil. Car puis que c'est vne iustice qui absout & iustifie gratuitement les pecheurs, elle est vn pur effet de grace & de misericorde. Et c'est en ce sens que l'Apostre en parle, Rom. 3. quand apres auoir representé que *nulle chair ne sera iustificée deuant Dieu par les œuvres de la loy*, il dit, *mais maintenant la iustice de Dieu est manifestée sans loy, étant à icelle rendu tesmoignage par la loy & par les Prophetes, voire la iustice de Dieu par la foy en Iesus Christ enue & tous & sur tous les croyans, estans*

*iustificiés gratuitement par la grace de Dieu, par la redemption qui est en Iesus Christ, lequel Dieu a preordonné pour propitiatoire en la foy en son sang, afin de demonstrier sa iustice par la remission des pechez precedens.* Ce Soleil donc est vn Soleil de iustice apportant & presentant la remission des pechez à tous pecheurs repentans, & vne pleine iustification en la lumiere de la parfaite iustice qu'il a pour les povres pecheurs par le merite de sa mort. Car pource que la misericorde de Dieu ne pouuoit estre exercée en choquant & violant sa iustice, Iesus Christ a satisfait par son sang à la iustice, afin de donner cours libre à la misericorde. Si donc, ô pecheurs, vous vous trouuez naturellement dans les tenebres de la mort & de l'ire de Dieu, voici le Soleil de iustice par lequel vous est donnée la lumiere de la paix de Dieu. Si vous estes comme tous noircis de peché, voici le Soleil dont la lumiere & la grace vous rendra plus blancs que neige. Et certes l'obeissance du fils de Dieu nous estant allouée, c'est comme si vn corps de foy

de foy tenebreux estoit tout couuert des rayons esclatans du Soleil. Et que diray-ie puis qu'Apoc. 12. l'Eglise est representee *reueſtue du Soleil*, aſçauoir comme conſtituée iuſte par l'obeiſſance du propre Fils de Dieu?

I'adjouſte que ce Soleil eſt Soleil de ſanctification, pour apres nous auoir reconciliez à Dieu par la foy, repurger nos ames des habitudes des vices & pechez par ſon eſprit, & nous reueſtir comme de lumiere, c'eſt à dire d'un nouuel homme *créé ſelon Dieu en iuſtice & vraye ſaincteté*: comme Rom. 13. l'Apotre parle d'eſtre *reueſtus des armes de lumiere*. Ce Soleil n'eſpandra point en vòs ames les rayons de la miſericorde & charité, par laquelle Dieu a donné ſon Fils à la mort pour vous, que la perſuaſion que vous en aurez ne rempLiſſe vos cœurs d'une grande triſteſſe de l'auoir offenſé, & d'une amour ardente qui vous faſſe deſormais cheminer ſelon ſa volonté, & que vous ne deueniez enfans de lumiere en vertus & bonnes œuures. Ainſi Ieſus Chriſt a pour ſes rayons non ſeulement le me-

**B**

I. Cor. I.

rite de son sang & de son obeissance pour nous iustifier & absoudre , mais aussi la vertu de son Esprit pour nous retirer des vices de nostre conuersation premiere : selon qu'il est dit qu'il nous a esté fait de par Dieu iustice & sanctification. Et de cette sanctification prouient la lumiere de paix & de ioye en nos consciences , selon que l'Apostre dit, Rom.14. que le Royaume de Dieu est iustice , paix & ioye par le S. Esprit:& Rom.8. que nous n'auons pas receu vn esprit de seruitude pour estre de rechef en crainte , mais vn esprit d'adoption par lequel nous crions Abba Pere.

Et cela se verifie quand le Propheete adjouste que ce Soleil de iustice porte la santé en ses aisles. Car nostre maladie consistoit en deux choses ; l'vne és peines & en l'ire de Dieu que le peché residant en nous auoit attirés sur nous : estant comme vne maladie infecte & puante qui auoit offensé la saincteté de Dieu. L'autre és vicieuses habitudes, lesquelles auoyent rendu les facultés de nos aines inhabiles à tout bien, & si incapables de l'amour de

de Dieu , que l'imagination des pensées du cœur de l'homme n'est que *Gen. 6.* mal en tout temps : car *la chair est inimitié contre Dieu , & n'est point suiuite à Rom. 8.* la loy de Dieu, & ne le peut. A l'opposite de quoy le Soleil de iustice a apporté la santé à deux esgards ; l'un est celuy que propose Esa. chap. 53. quand il dit du Christ , qu'il a esté navré pour nos pechés, froissé pour nos iniquités , que l'amende qui nous apporte la paix est sur luy , & que par sa meurtrisseure nous auons guérison : qu'il a porté nos langueurs & a chargé nos douleurs. Ainsi S. Pierre dit qu'il a porté nos pechés en son corps sur le bois , & *1. Pier. 2.* que par sa batture nous auons esté guéris. L'autre esgard est qu'il restaure & guérit nos ames de leurs mauuaises habitudes & qualités , les regenerant par son Esprit : & que la foy en son nom establit dans les cœurs l'amour & la crainte de Dieu, & la charité enuers le prochain. Car celuy qui a veu en la lumiere de ce Solcil la beauté de la face de Dieu en charité, iustice & sainteté , prend en haine le vice & tafche à se transformer en l'image de

Dieu : qui est l'efficace que propose l'Apostre 2. Corint. 4. quand il dit que *contemplant comme en un miroir la gloire du Seigneur à face descouverte, nous sommes transformés en la mesme image de gloire en gloire, comme par l'Esprit du Seigneur.* Ici la lepre (qui est le vice d'estre insensible aux necessités du povre) se change en vne chair viue, pleine de sentiment & de compassion pour l'affligé. Ici l'enfleure & l'hydropisie de l'orgueil se change en humilité de cœur : l'ardeur des conuoitises & passions en abstinence & temperance. Et les douleurs aiguës de l'anxiété de la conscience se changent en paix & tranquillité. Car *estans iustificiés par foy nous auons paix enuers Dieu.* Quiconque contempera par vraye foy Iesus Christ trouuera ce que iadis ceux qui regardoyent le serpent d'airain, & qui estans mordus des serpens bruslans du desert, estoient gueris de l'ardeur du venin qui brusloit leurs entrailles. Ainsi l'œil qui regarde Iesus Christ reçoit la guerison du venin que l'ancien serpent auoit mis en nous par sa morsure.

Et

Rom. 5.

Et tout de mesme que la femme travaillée du flux de sang qui vint à Iesus Christ par foy, & le toucha, se sentit à l'instant guerie de son fleau, d'autant que vertu estoit sortie de Iesus Christ; ainsi qui ouvrira d'un cœur de repentance les yeux de son ame à Iesus Christ, en recevra la vertu en vraie sanctification & en consolation. Et c'est tres-à propos que le Prophete exprime les biens que respand sur nous ce Soleil de iustice, par les termes d'apporter la santé, puis qu'en la nature souuent les malades souhaitent l'arriué du iour, comme sentans que le leuér du Soleil leur apporte quelque soulagement. Et plusieurs maladies qui n'ont peu estre gueries pendant l'hyuer prennent fin au renouveau, quand les rayons du Soleil ont plus de force. Et les lieux où les rayons du Soleil ne donnent point sont communément tenus pour mal sains. Et partant de cette santé corporelle nous esleuons nos esprits à la santé spirituelle que nous auons du grand Soleil de nos ames Iesus Christ

nostre Seigneur, afin que nous recourions à lui avec d'autant plus de liberté qu'il declare estre venu comme medecin pour les povres malades, quand il a dit, *Ceux qui sont sains n'ont pas besoin de medecin, mais ceux qui sont malades. Je ne suis pas venu appeler les iustes, mais les pecheurs à repentance.* Afin qu'apres estre venus à luy, nous disions avec le Prophete Ps. 103. *Mon ame beni l'Eternel & n'oublie pas un de ses bienfaits. C'est luy qui pardonne toutes tes iniquités, & guerit toutes tes infirmités.*

C'est aussi avec grace que le Prophete nous parle des aïles de ce Soleil, disant qu'il *porte la santé en ses aïles*, accompagnant les rayons par lesquels le Soleil va comme s'estendant en faisant sa course, aux aïles par lesquelles les oiseaux s'estendent par l'air en volant. Les rayons donnans comme de l'estendue au corps du Soleil, & l'estargifans ainsi que les aïles sont aux oiseaux comme vne dilatation de leur corps. Secondement pour ce que le Prophete parlant de santé semble avoir esgard au bien & au soulagement

que

que les oiseaux apportent à leurs petits quand ils les couvrent de leurs aïles en leurs maux & infirmités, les rechauffans par ce moyen, comme aussi les garentissans contre les injures de l'air : A quoy Iesus Christ regardant dit à Ierusalem qu'il a voulu assembler ses enfans *comme la poule assemble ses poussains sous ses aïles* : aussi Dieu voulut montrer dedans son propre sanctuaire sa grace & sa protection par cette comparaison là, quand il voulut que sur le propitiatoire il y eust les aïles des Cherubins estendues. A quoy le Prophete regardant disoit Ps.61. *Je séjourneray en ton tabernacle par longs siècles, ie me retireray sous la cachette de tes aïles.* Et Ps.91. il dit à celuy qui a pris Dieu pour sa retraite & son assurance, *il te couvrira de ses plumes, tu auras retraite sous ses aïles.* Et le propitiatoire où ces aïles estoient ainsi estendues, estoit le type & la figure de Iesus Christ, lequel Dieu a ordonné pour propitiatoire par *Rom.3.* *la foy en son sang.* Pour vous dire que Iesus Christ a des aïles estendues pour nous mettre à couvert contre tous maux & contre l'ire de Dieu.

## II. POINCT.

**M**Ais voyons maintenant quel est le leuer de ce Soleil, en ces mots de nostre Prophete, A vous qui craignez mon nom *se leuera* le Soleil de iustice. Il faut considerer ce leuer en plusieurs degrés. Le premier a esté l'incarnation de Iesus Christ & son apparition en la terre, pour l'œuvre de nostre redemption par sa mort & resurrection. C'est heu esgard à ce leuer que Iesus Christ venant es marches de Zabulon & de Neplatali vers la mer, S. Matthieu dit,

*Mat. 4.* que ce fut *afin que fust accompli ce dont auoit esté parlé par Esaie le Prophete, Le peuple qui gisoit en tenebres a veu une grande lumiere, & à ceux qui gisoient en la region d'ombre de mort, la lumiere leur est leuée.*

Auparauant le Fils de Dieu habitoit avec le Pere vne lumiere inaccessible: mais alors il vint comme vn Orient resplendir sur nostre orizon. L'Eglise auoit bien eu auparauant la lumiere des propheties; mais l'accomplissement des promesses & predictions par la venue du Christ apportoit la plene lumiere. Outre que tout ce

qu'il

qu'il y auoit eu de lumiere & de gloire auparauant auoit esté couuert du voile espais des ceremonies & des ombres, lequel auoit esté figuré par celuy que Moyse mit sur sa face pour ce que le peuple ne peut porter la splendeur de ses rayons. <sup>2. Cor. 3.</sup> Partant toute ce qu'il y auoit eu de lumiere auoit esté comme une nuit en laquelle la clarté que quelques estoiles donnent n'est qu'obscurité, à comparaison de la clarté que le Soleil apporte par son leuer. Et voyez pour l'analogie de la naissance du Christ au leuer du Soleil que Dieu voulut qu'une *estoile apparust* <sup>Matth. 2.</sup> *en Orient* pour le monstrier.

Le second leuer du Soleil de iustice a esté par la predication de l'Euangile, apres l'ascension de Iesus Christ au ciel. Le Fils de Dieu estant entré en la mort, & s'estant leué du sepulchre par la resurrection, & estant monté à la dextre du Pere, de là espendit ses rayons par toute la terre par la predication de l'Euangile, pour laquelle il enuoya ses Apostres en l'vniuers: *Estant monté en haut* (dit l'Apostre Eph. 4.

il a donné des dons aux hommes, & a donné les uns pour estre Apostres, les autres pour estre Prophetes, les autres pour estre Euan-gelistes, les autres pour estre Pasteurs & Do-cteurs, pour l'assemblage des Saints, pour l'œuvre du ministere, &c. Et l'Apostre ayant esgard à ce qui est dit au Ps. 19. du Soleil allant d'un bout du Ciel à l'autre, & des cieux dont le son, (encor qu'il n'y ait point en eux de langage) va par toute la terre, applique cela mesme au son de la predication de l'Euangile porté par toute la terre par le ministere des Apostres. Comme pour dire que ce Soleil s'estoit leué & auoit fait sa cour-se en peu de temps par tout le monde par le son de l'Euangile. Alors ce So-leil, qui estoit la gloire d'Israel, fut aussi la lumiere des Gentils, selon la predi-cation de Simeon. Alors furent de-chassées du monde les tenebres de l'i-dolatrie Payenne; & les hommes transportés de la puissance des tene-bres au royaume du Fils bien aimé de Dieu. Alors fut mise en lumiere la vie & l'immortalité par l'Euangile: Alors l'Apostre dit à ceux qui auoyent esté fans

sans esperance & sans Dieu au monde que la *nuit estoit passée*, & le iour approché. Ainsi la predication de l'Euangile a esté comme les aisles par lesquelles le Soleil de iustice s'est porté, & se portera iusqu'à la fin du monde en l'univers. Et c'est eu esgard à cette lumiere portée par le ministere de l'Euangile que les Eglises sont Apocal. i. accomparées à des chandeliers, le ministere esleuant la lumiere de l'Euangile à plusieurs. Et comme le Soleil esclaire successiuelement toute la terre, ainsi il faut que l'Euangile soit presché à toutes nations successiuelement: & comme le Soleil se leuant aux vns se couche à d'autres, ainsi Dieu transporte d'un lieu à l'autre la lumiere de l'Euangile.

Et de ce leuer du Soleil de iustice par la predication de l'Euangile, considerez-en vn troisieme qui est particulier & mystique, quand ce Soleil se leue dedans le cœur d'un chacun de nous en particulier par la vertu secrette & efficace du S. Esprit; qui est le leuer dont parle S. Pierre en sa seconde,

quand il dit à ceux auxquels il escrit, qu'ils font bien d'estre ententifs à la parole des Prophetes comme à vne chandelle, qui luit en lieu obscur, *insqu'à ce que le iour esclaire, & que l'estoile du matin se leue en vos cœurs.* Car ce n'est pas assez que le Soleil de iustice se leue sur nous exterieurement par la predication de l'Euangile, si Dieu n'opere en nous interieurement pour nous faire receuoir ses rayons, & comme pour former ce Soleil au dedans de nos ames, dissipant les tenebres de nos entendemens & les conuoitises mondaines de nos cœurs, selon que l'Apostre disoit aux Galates, qu'il traualloit iusques à ce que Iesus Christ *fust formé en eux.* Nul, dit Iesus Christ, *ne vient à moy si mon Pere qui m'a enuoyé ne le tire : quiconque a ouy & a appris du Pere vient à moy.* Le Soleil de iustice luisoit exterieurement à tous ceux auxquels S. Paul preschoit dans la ville de Philippes, mais il ne luisoit interieurement qu'à Lydie, de laquelle il est dit que *Dieu luy ouurit le cœur pour entendre aux choses que Paul disoit.* Car les affe-

2. Pier. 1.

Gal. 4.  
Jean 6.

Act. 16.

affections charnelles, l'avarice, l'ambition, & les voluptés obscurcissent naturellement si fort nos entendemens, que l'Apostre dit que *l'homme* <sup>1. Cor. 2.</sup> *animal ne comprend point les choses qui sont de Dieu, & ne les peut entendre, d'autant qu'elles se discernent spirituellement.* C'est pourquoy l'Apostre disoit 2. Corint. 4. *Si nostre Euangile est couuert, il est couuert à ceux qui perissent, esquels le Dieu de ce siecle a aueuglé les entendemens, asçauoir des incredules, à ce que la lumiere de l'Euangile de la gloire de Christ ne leur resplendist.* Où remarqués ces mots [le Dieu de ce siecle] qui donnent à entendre que l'aueuglement des entendemens prouient des interests de ce siecle & des biens de ce monde qui nous paroissent comme le souuerain bien, & par cette fausse splendeur nous empeschent de reconnoistre la gloire de Christ & la verité des biens de son royaume: afin qu'ici le fidele demande continuellement l'Esprit de sapience & de reuelation afin qu'il sçache quelle est l'esperance de la vocation diuine, & quelles sont les ri-

chesses de la gloire de son heritage és  
Saints , & die avec le Prophete Ps.  
119. Seigneur illumine mes yeux , afin  
que ie voye les merueilles de ta loy.

Il y a vn quatrieme leuer du Soleil  
de iustice par sa prouidence , aſçauoir  
quand estans dans les dangers ou dans  
les afflictions & les miserres comme  
dans des tenebres espaiſſes, où aucune  
esperance de secours ne nous reluit de  
la part des causes secondes , le Sei-  
gneur vient nous tendre sa main , &  
nous fait voir la deliurance. Car alors  
l'Eternel est vn vray Soleil qui se leue  
sur nous , selon que disoit le Prophete  
Ps.84. *L'Eternel nous est vn Soleil & vn  
bouclier , l'Eternel donne grace & gloire.*  
Et Ps.27. *L'Eternel est ma lumiere & ma  
deliurance , de qui aurai-ie peur? & ail-  
leurs, L'Eternel fera reluire mes tenebres ;  
dont Ierusalem disoit dans Michee ne  
se reſtoui point mon ennemi , car si ie suis  
tombée, ie me releueray ; si ie suis gisante es  
tenebres , l'Eternel est ma lumiere.* Ainsi  
quand Ioseph estoit dans les prisons  
en Egypte, il vit en vn moment luire sa  
deliurance : Et de mesmes quand l'E-  
glise

*Mich.7.*

glife fut dans la captiuité de la Baby-  
 lon ancienne. Et L'Apostre nous  
 monstre cette sorte de deliurance <sup>2 Thess. 2.</sup>  
 pour l'Eglise Chrestienne des derniers  
 temps, quand en parlant de son enne-  
 mi, le Fils de perdition, & de son ad-  
 uenement, il dit que le Seigneur le  
 destruira *par la clarté de son aduenement.*  
 Si donc, ô Fideles, vous vous trouuez  
 dans les tenebres de maux, dites que  
 comme apres la nuit le Soleil se leue  
 qui amene le iour, ainsi le Soleil de  
 grace & de deliurance se leuera sur  
 vous : Dans la nuit de vos afflictions,  
 dites que le pleur hebergera le soir, &  
 & le chant de triomphe reuiendra au  
 matin. Et que comme il est dit Ps. 68.  
*quand vous auriez esté noircis comme ceux  
 qui auroyent couché en un foyer entre des  
 chenets, vous reluirez comme les aïstes d'u-  
 ne colombe couverte d'argent, & dont les  
 plumes sont iaunies d'or.* Oyez donc  
 cette consolation, que vous auez au  
 ciel un Soleil lequel se leuera sur vous  
 quand vous y esleuerez vos prieres &  
 vos gemissemens, selon que dit le Pro-  
 phete Ps. 4. *Plusieurs disent, qui nous se-*

*ra voir des biens? leue sur nous la clarté de sa face, ô Eternel : & Ps. 34. l'a-on regardé on en est tout esclairé, & nos faces ne sont point confuses.*

Le cinquieme leuer du Soleil de iustice sera au dernier iour, auquel Iesus Christ venant pour iuger l'uniuers il apparoitra avec vne splendeur estendue d'un bout du ciel à l'autre (comme quand l'esclair apparoit d'Orient iusques en Occident) en venant és nuées du ciel avec maiesté & grande gloire. Et ce sera comme un vray leuer, entant que tout ce qui sera passé des souffrances de l'Eglise en la terre en tous les siècles, aura eité iusqu'alors comme vne nuit & vn estat de tenebres; selon que Iesus Christ appelle *l'heure & la puissance des tenebres* le temps auquel les meschans preualent en la terre. Et par consequent la venue du Redempteur sera comme vn vray leuer du Soleil pour dissiper toutes les tenebres de l'Eglise; dont Iesus Christ dit aux fideles qu'alors ils dressent leurs testes en haut, pource que leur redemption approche. **Adjoustez que**  
iuf-

*Luc 21.*

iusqu'à ce iour les corps des fideles de-  
 cedés auront esté dans les sepulchres  
 & dans la poudre de la terre comme  
 dormans pendant une nuit tenebreu-  
 se, pour se resueiller au leuer de ce So-  
 leil diuin & viuifiant : dont le Prophe-  
 te, Ps.17. appelle le temps de son res-  
 ueil le iour de la resurrection glorieu-  
 se, disant, *Je verray ta face en iustice & ie  
 seray rassasié de ta ressemblance, quand ie  
 seray resueillé :* & Ps.49. il dit que les  
 iustes domineront sur les meschans *au  
 matin*, c'est à dire au matin de ce  
 grand iour où le Soleil de iustice se le-  
 uera sur nous. Et comme à present à  
 la venue du Soleil les estoiles dispa-  
 roissent, ainsi à l'aduenement de ce  
 grand & diuin Soleil, le Soleil & la  
 Lune d'à present perdront leur clarté.  
 Et S. Iean dit qu'il ne vit dans la nou- *Apoc 21.*  
 uelle Ierusalem point de Soleil & de  
 Lune pour y luire, *pource que Dieu l'a  
 illuminée, & l'Agneau est sa chandelle.*  
 Alors il se leuera vraiment comme  
 vn Soleil pour les fideles ; puis que ce  
 sera pour remplir leurs ames & leurs  
 corps de sa lumiere ; selon qu'il est dit

C

que *les iustes reluiront comme le Soleil au royaume de leur Pere.* Et quant aux mechans il se leuera comme un Soleil bruslant & consumant, selon que Malachie dit dans le chapitre de nostre texte, *voici le iour est venu arduant comme un four, tous les orgueilleux & tous ceux qui font meschanceté seront esteule, & ce iour là les embrasera.*

### III. POINCT.

**M**Ais voyons maintenant comment sont qualifiés ceux auxquels le Soleil de iustice se leuera, à vous, dit l'Eternel, *qui craignez mon nom* se leuera le Soleil de iustice. Le Prophete parle ainsi au peuple de Dieu, voulant consoler les gens de bien contre les impies & profanes, en leur promettant que le Seigneur viendroit à leur salut & consolation. Autrement il ne faudroit pas estimer que le Soleil de iustice ne fust leué que pour ceux qui estoient desia dans son Eglise, & cheminoyent en sa crainte. Car il s'est leué mesme pour les povres pecheurs d'entre les gentils qui estoient sans Dieu au monde  
pour

pour les conuertir à foy & les porter à craindre Dieu ; selon ces paroles de Iesus Christ à S. Paul. *Je t'enuoye vers les Gentils pour ouvrir leurs yeux, afin qu'ils soyent conuertis des tenebres à la lumiere & de la puiffance de Satan à Dieu, pour receuoir remission des pechés & part entre ceux qui sont sanctifiés par la foy qui est enuers moy.* Act. 26. Il y a donc à distinguer deux leuers de ce Soleil, l'un à ceux qui ne craignoient point encor Dieu pour les amener à le craindre en croyant à l'Euangile. Et c'est ainsi qu'il s'est leué à toute la terre par la predication des Apostres, ayant rayonné sur ceux qui estoient morts en leurs fautes & pechés, cheminans selon le train de ce monde, accompliffans les desirs de la chair & de leurs pensées, & les ayant viuifiés & conuertis à Dieu. L'autre leuer a esté à l'Eglise d'Israel, asçauoir aux gens de bien qui soufpiroyent apres sa venue & attendoient son regne, sa venue les ayant consolés & rendus participans des merueilles de sa grace. Car nous voyons en l'Euangile que Iean Baptiste

auoit disposé plusieurs d'Israel à attendre & receuoir le Christ par amendement de vie : & il est dit des gens de bien d'alors qu'ils attendoyent le regne de Dieu , & la consolation d'Israel. Certes les hommes ne preuenient point ce Soleil de iustice, c'est lui qui les preuient , & ce sont les rayons de sa grace qui forment en eux tout ce qu'ils ont de bien & de crainte de Dieu. Mais il faut distinguer deux degrés au leuer de ce Soleil ; l'un par une grace preuenante qui non seulement inuite, mais ameine effectiuement les pecheurs à repentance ; & l'autre par une grace subsequente dont il se leue sur ceux qui par grace ont creu & ont esté conuertis à Dieu ; se leue , di-ie, pour les benir, consoler & proteger, & remunerer par ses bien-faits leur foy & leur pieté. Et ainsi vous voyez mes Freres combien est necessaire la crainte de Dieu : veu que le leuer du Soleil de iustice est tousiours pour elle, a. s. ou pour la produire, ou pour la remunerer. Je di pour la produire ; car *la grace de Dieu salutaire à tous hommes est clairement apparue, nous denonçant qu'en raison-*

Tit. 2.

çant à toute impieté & aux mondaines con-  
 uoitises nous viuions en ce present siecle sob-  
 brement, iustement & religieusement. Pour  
 la remunerer: Car si apres auoir receu  
 l'Euangile vous faites des fruits con-  
 uenables à repentance, le Seigneur  
 adjousterà grace sur grace & vous es-  
 clairera de plus en plus selon sa pro-  
 messe. *Si quelcun m'aime & garde ma paro-* Jean 14.  
*le, ie me declareray à luy, mon Pere l'aimera,*  
*& nous viendrons à luy & ferons de-*  
*mourance chez luy.* Si donc vous estes  
 encor en vos pechés ce Soleil de iusti-  
 ce vous incite à vous resueiller. *Res-* Eph. 5.  
*ueille toy, toy qui dors, & te releue des*  
*morts, & Iesus Christ t'esclairera.* Mais si  
 apres que vous auez receu la lumiere  
 par la predication de l'Euangile, vous  
 viuez sans crainte de Dieu, & detenez  
 la verité en iniustice, & vous aimez  
 mieux les tenebres que la lumiere, ap-  
 prehendez ses vengeance. Ce Soleil  
 vous sera vn Soleil bruslant & consu-  
 mant: autant que Iesus Christ est benin  
 & gracieux en inuitant un chacun à se  
 conuertir à luy, autant est-il seuerer &  
 rigoureux contre les rebelles à son

Euangile, & les contemppteurs de son Nom : car il est dit de sa venue Ps. 97. *un feu marche deuant luy pour brusler tout à l'entour ses ennemis : & 2. Pier. 3. les elements seront dissous par chaleur, & la terre & toutes les choses qui y sont brusleront entierement* : qui donc subsistera en son indignation.

Au reste, la crainte dont il est ici parlé exprime en general l'amendement de vie & l'estude de sanctification, entant que le motif de toute la sanctification & du renoncement à nos conuoitises est la crainte que nous auons d'offenser le Pere celeste & d'encourir son indignation. Et cette crainte a pour suiet & occasion nos inclinations naturelles au peché, auxquelles nous resistons par la crainte de Dieu: Car au ciel, là où ces mauuaises inclinations ne seront plus, il ne sera pas besoin de ce frein. Or dès ici bas, la crainte que Dieu requiert de nous n'agit pas simplement par l'appréhension de la peine, mais principalement par l'amour & reuerence que nous luy portons. Car c'est vne crainte filiale

par

par laquelle nous agissons comme des enfans bien nés qui ont plus de crainte de fascher & contrister leur Pere à l'encontre d'eux, que des chastimens qu'ils en pourroyent recevoir. Et à cela se rapporte ce qu'il dit, qui craignez *mon Nom*. Car le nom de Dieu est la reuelation & la manifestation que Dieu a faite de soy, selon que le nom est ce qui donne à connoistre vne chose. Or la reuelation que Dieu nous a faite de soy en l'Euangile est de la charité par laquelle il a liuré son Fils à la mort pour nous, & de la dilection paternelle par laquelle il nous aime comme ses enfans en Iesus Christ, nous ayant adoptés en luy pour nous rendre ses heritiers & les coheritiers de son Fils Iesus Christ. Et il est evident que cette reuelation oblige totalement à vne crainte de reuerence & d'amour.

### CONCLUSION.

**O**R maintenant, pour l'application de ce texte, nous monstrerions, si le temps nous le permettoit

combien les Docteurs de l'Eglise Romaine, quand il s'agit de Iesus Christ & de la communion que nous auons avec luy, abusent des comparaisons que l'Escriture employe des choses terriennes & naturelles, comme de celle de la viande & du breuvage, voulans que nous mangions de la bouche du corps la substance de la chair de Iesus Christ. Car Iesus Christ est dit nostre viande, tout de mesme qu'il est appelé *nostre lumiere* & nostre Soleil : estant l'un comme l'autre par le benefice de sa mort. Iesus Christ nourrit, entant que viande, tout de mesme qu'il esclaire & viuifie entant que Soleil. Or comme ce n'est pas l'œil du corps mais l'œil de l'ame, asçauoir la foy, qui reçoit les rayons & la lumiere de ce Soleil ; de mesmes aussi ce n'est pas la bouche du corps, mais celle de l'ame, asçauoir la foy qui mange cette viande. Et si le Soleil corporel residant dans le ciel penetre dedans nous par ses rayons, & surmonte la distance qui est entre luy & nous, comment est-ce que ce Soleil di-

diuin residant à la dextre du Pere , ne  
 pourra par les rayons de son Esprit s'v-  
 nir à nous & penetrer iusques dans le  
 fonds de nos entendemens & de nos  
 cœurs ? preparons donc non nos yeux  
 charnels, non plus que la bouche du  
 corps , mais les yeux de l'ame à rece-  
 uoir ce Soleil de iustice qui se leue sur  
 nous : Et pour cet effet, comme quand  
 nous voulons regarder vne chose,  
 nous destournons la veüe de dessus les  
 autres objets , destournons nos affe-  
 ctions & nos cœurs de dessus les cho-  
 ses de ce siecle auxquelles nous nous  
 arretons naturellement, afin que nous  
 puissions regarder le Soleil de iustice  
 qui se presente pour nous esclairer en  
 vie eternelle : mettons fortement &  
 fixement en nos esprits que nos pe-  
 chez & nos vices sont des tenebres  
 spirituelles qui menent aux tenebres  
 eternelles de l'abyssme , afin qu'une  
 sainte frayeur nous face ouvrir les  
 yeux à la lumiere de vie : sçachons  
 que les choses de ce monde , les ri-  
 chesses, les commoditez & les plaisirs  
 de la chair n'ont de splendeur que

1. Cor. 7.

Ps. 49.

fausse & mensongere, afin que nous ne nous en laissions pas esblouir. Ne voyons nous pas que la figure de ce monde passe, que le riche *quand il meurt n'emporte rien & que sa gloire ne descend point après luy?* pourquoy donc nous laisser seduire à la lueur & apparence de ces choses charnelles & terriennes & au lustre trompeur que l'avarice, l'ambition & les voluptés admirent en leurs obiets? Et, puis que la nature a rendu impossible à l'homme de regarder en mesme temps le ciel & la terre, que cela nous soit vn enseignement des choses morales, asçavoir que nous ne pouuons en mesme temps regarder le Soleil de justice, & donner nos cœurs aux choses de la terre.

Gemissons donc d'auoir iusqu'ici tant attaché nos yeux aux choses perissables, & meditons que Dieu nous en destache par les afflictions qu'il enuoye, & qu'il dispense ces maux par sa sagesse & par son amour, afin que nous cerchions la lumiere & les biens d'une vie eternelle, lesquels nous negligions.

Sou-

Souuenons-nous que nous sommes faits enfans de lumiere, afin que nous cheminions comme de iour, non point en paillardise & souïllure, gourmandise & yvrognerie, passion d'auarice & d'ambition, qui sont œuvres infructueuses de tenebres, mais en la lumiere des vertus Chrestiennes, selon que Iesus Christ a dit, *que vostre lumiere luise deuant les hommes, afin qu'ils voyans vos bonnes œuvres glorifient vostre Pere qui est és cieux.* *Matth. 5.* Et regardons nos pechés comme des maladies pour chercher nostre santé par foi, & amendement de vie és aïles du Soleil de iustice, le regardans en sa mort & en sa resurrection, comme le principe de nostre guerison, en mortifiant en nous le peché avec ses conuoitises. Car iusques à quand demeurerons-nous volontairement en nos maladies, & en negligerons-nous la cure & l'amendement, veu que le Soleil de justice luit sur nous de si long temps pour nous en donner la guerison?

Vendredi prochain nous celeberrons la venue & naissance de Iesus

Christ au monde & le premier leuer du Soleil de iustice sur l'univers, demandons luy qu'il vienne se leuer en nos cœurs, y formant l'amour & la crainte de Dieu. Et meditons le dernier leuer de ce Soleil de iustice lequel Malachie a joint au premier. Veü que depuis que ce Soleil s'est leué sur les hommes (il y a tant de siècles) par son incarnation, sa mort & sa resurrection, & qu'il a fait le cours (par la predication de l'Euangile) de tout le monde, il ne nous reste sinon qu'il se leue par son apparition glorieuse pour iuger la terre. Or

*2. Pier. 3. quels nous faut-il estre en sainte conuersation & œuvres de pieté, en attendant & nous hastant à la venue du iour de Dieu?*

Si nous cheminons en tenebres nous n'aurons que de l'effroy de la pensee du leuer de ce Soleil de iustice; ses rayons embrasans la terre & tout ce qui y est, dissolvans les cieux & les faisans passer avec vn bruit siffant de tempeste, ne pourront sinon nous estre matiere d'angoisse & de tremblement. Mais si nous cheminons en

sa crainte nous aurons assurance , & toute matiere de paix , veu qu'il apparoistra pour *estre glorifié en ses sainctz & estre rendu admirable en tous les croyans.*

Or iusques à ce temps là ne soyons point effrayez dans les tenebres des aduersitez , dans lesquelles il plaira à Dieu que nous nous trouuions , pour ce que par la prouidence admirable de nostre Pere celeste , le Soleil de grace , de faueur & d'assistance se leuera sur nous quand il en sera temps ; l'Eternel fera reluire nos tenebres , il fera sourdre comme du ciel la deliurance & l'allegement. Car il est fidele & ne permettra point que nous soyons tentez outre ce que nous pourrons , mais pour nous en donner l'issue il fera reluire dedans nos ames son Esprit en humiliation , patience & esperance pour nous rendre plus que vainqueurs de la tentation. Seulement regardons continuellement le Seigneur par prieres de foy & de repentance , & nous serons tous esclairez de sa face : ce Pere de lumiere fera

descendre sur nous tout don parfait &  
toute bonne donation , jusqu'à ce que  
vienne le temps où nous le voyions  
face à face & soyons transformés en  
sa semblance de lumiere en lumiere  
& de gloire en gloire. Amen.

